

**Crònica des de Compostela.** —1. O Día das Letras Galegas, que a RAG (Real Academia Galega) instituíu o 17 de maio de 1963 co gallo do centenario da publicación de *Cantares gallegos* de Rosalía de Castro, foille dedicado en 1999 ó xornalista e poeta Roberto Blanco Torres, asasinado en outubro de 1936. O homenaxeado no ano 2000 foi o erudito e historiador Manuel Murguía, ideólogo do Rexurdimento galego da 2ª metade do séc. XIX e primeiro presidente da Academia.

Entre xullo de 1998 e setembro de 1999 cubríronse as vacantes da RAG, ó tomaron posesión das súas cadeiras o avogado, poeta e lexicógrafo Xosé Luís Franco Grande, o lingüista Antón Santamarina, o economista Xaime Illa Couto, o arquitecto Andrés Fernández-Albalat Lois e os lingüistas Ramón Lorenzo e Francisco Fernández Rei. Pouco despois de completarse o número de académicos da RAG (na actualidade 25), en novembro de 1999 falecía o etnógrafo Antón Fraguas Fraguas, que ocupara a vacante de Daniel A. Rodríguez Castelao.

2. Celebrouse na Universidade de Santiago de Compostela (26-30.10.98) a *Setmana de l'occitan a Santiago. L'occitan, lenga europèa / Semana do occitano en Santiago. O occitano, lingua europea*, organizada polas áreas de Filoloxía Románica e Filoloxía Catalana. Occitanistas como Lafont, Martel, Lamuela, Boyer, Gardy, Grosclaude, Hammel e outros analizaron o presente e o futuro do occitano dentro e fóra de Francia, así como a súa presenza social, especialmente no ensino e nos medios de comunicación.

Entre o 20 e o 25 de setembro de 1999 celebrouse en Santiago de Compostela o *XX Congreso Internacional de Ciencias Onomásticas*, organizado polo ILG (Instituto da Lingua Galega) en colaboración co ICOS (International Committee of Onomastic Sciences). O comité organizador estaba integrado polo director do ILG Antón Santamarina, que en galego pronunciou a conferencia inaugural *Viaxe pola onomástica galega*, e polos tamén membros do devandito Instituto Ramón Lorenzo, Ana I. Boullón Agrelo e Fernando R. Tato Plaza.

Igualmente en Santiago de Compostela celebrouse o *XII Colloque International de l'Atlas Linguistique Roman* (do 26 de setembro ó un de outubro de 1999), organizado por Manuel González, da Universidade de Santiago, e Michel Contini, da Universidade de Grenoble, coa finalidade de os representantes dos comités nacionais do ALiR analizaren as sínteses do vol. 2 b deste proxecto panrománico. Entre outros romanistas estiveron presentes J. Veny e J. E. Gargallo do comité catalán; J. Médélice e M. R. Simoni do francés; M. P. García Mouton do español; S. Canobbio, E. Carpitelli e L. Massobrio do italiano; N. Saramandu, J. Faiciuc e S. Bejean do romanés; e M. Celeste Augusto, J. Saramago, L. Segura e G. Vitorino do portugués.

En Santiago tamén se celebraron os *III Encontros para a Normalización Lingüística* (28-29.10.99), organizados polo APNL da Ponencia de Lingua do Consello da Cultura Galega, e mailo Curso de Iniciación á Terminoloxía (18.11-10.12.99) organizado por TERMIGAL, servizo de terminoloxía da Real Academia Galega e do Centro "Ramón Piñeiro". O Departamento de Filoloxías Francesa e Galego-Portuguesa da Universidade da Coruña organizou un Simposio sobre o escritor e político Castelao (25-27.11.99), onde historiadores, escritores, lingüistas e críticos literarios analizaron a obra desta figura emblemática do nacionalismo galego do séc. XX. E na Universidade de Vigo celebrábase o *I Simposio Internacional das linguas sen estado: Francia e Italia* (17-18.12.99), organizado pola Universidade de Vigo e pola MNL (Mesa pola Normalización Lingüística).

3. A Universidade de Santiago de Compostela, o Concello de Ribadeo e o Grupo multimedia Voz, co gallo do centenario do nacemento de Dámaso Alonso, vencellado afectiva e intelctualmente a Galicia e grande estudioso do galego de Asturias e de León, convocaron en 1998 un premio anual co nome do egrexio poeta e profesor, para filólogos de calquera nacionalidade menores de 30 anos. O I Premio "Dámaso Alonso" de Investigación Filolóxica 1999 gañouno Álvaro Arias Cabal coa obra *El morfema de 'neutro de materia' en asturiano*.

4. En 1998 editouse a *Homenaxe a Ramón Lorenzo* (2 t.), a cargo de Dieter Kremer, con 81 colaboracións: 38 tratan temas lingüísticos, 16 versan sobre filoloxía e literatura medieval e as restantes son de crítica e creación literaria, cultura e historia.

A Comisión de Toponimia da Xunta de Galicia, está ultimando os traballos de fixación da forma galega oficial de tódalas entidades de poboación. Despois da edición do *Nomenclátor de Galicia. Ourense* en 1996, en 1998 apareceu o *Nomenclátor de Galicia. Pontevedra* 1998, estando practicamente ultimados os dictames relativos ós concellos de Lugo e da Coruña.

En novembro de 1999 a Universidade de Santiago publicou o volume *Estudios de Sociolingüística Románica. Linguas e variedades minorizadas*, a cargo de Antón Santamarina e Fernández Rei. Despois dun traballo inicial sobre unha proposta tipolóxica de clasificación dos estándares románicos “baixo presión” (Muljačić) analízase a situación de diversas linguas minorizadas: galego (Fernández Rei), “galego” de Cáceres (Costas González), asturiano (Cano), mirandés (Barros), aragonés (Nagore), catalán (Boix Fuster), catalán de Aragón (Gargallo), occitano (Taupiac e Alén), aranés (Gargallo), occitano do Piemonte (Genre), romanche (Vañó), corso (Fusina) e sardo (Lőrinczi e Corrairie). Fecha o libro un amplo traballo sobre o romanés con especial atención ás variedades fóra de Romanía (Ionescu).

Agás o mirandés, que se editou na versión orixinal portuguesa, o galego é o idioma dos artigos deste volume co que os editores queren apostar desde o *Finisterrae* románico atlántico pola *etnodiversidade* como garantía da supervivencia da humanidade e do equilibrio das culturas. [F. F.-R.]